



Broj: 01-50-1-15-20/07
Sarajevo, 16. 1. 2008. godine

Z A P I S N I K
20. sjednice Predstavničkog doma
Parlamentarne skupštine Bosne i Hercegovine,
održane 16. 1. 2008. godine

Sjednica je počela u 10,29 sati. Prisustvovalo je 40 poslanika. Opravdano su odsustvovali Bakir Izetbegović i Zlatko Lagumdžija.

Iz Vijeća ministara BiH sjednici su prisustvovali: ministri Sredoje Nović i Božo Ljubić i zamjenici ministara Marina Pendeš, Srđan Arnaut i Fuad Kasumović,

Iz međunarodnih organizacija sjednicu su pratili predstavnici: OHR-a, OSCE-a, EUSR-a, američke i britanske ambasade, te nevladinih organizacija Centara civilnih inicijativa i Centra za promociju civilnog društva.

Na početku sjednice Dom je minutom ćutanja odao počast makednoskim vojnicima poginulim u teškoj avionskoj nesreći prilikom povratka iz Bosne i Hercegovine, nakon završetka učešća u Misiji EUFOR-a u našoj zemlji.

U okviru prethodnog pitanja, predsjedavajući je na glasanje dao prijedlog da se Prijedlog rezolucije o ubrzanju procesa pristupanja BiH u članstvo EU (predlagači: poslanici Kluba SDP-a) prethodno razmatra u nadležnoj komisiji, napomenuvši da se predložena rezolucija automatski uvrštava u dnevni red sjednice ako Dom ne odluči da se prethodno razmatra u komisiji.

Sa 22 glasa "za" (Federacija BiH 15, RS sedam) i tri "protiv", Dom je odlučio da se Prijedlog rezolucije prethodno razmatra u nadležnoj komisiji.

Zatim je predsjedavajući dao kratke uvodne napomene o prijedlogu dnevnog reda.

U raspravi o Prijedlogu dnevnog reda, Denis Bećirović ponovo je postavio pitanje zašto nije osiguran direktan TV prijenos sjednice, podsjetivši i na zaključak Doma i poslovničku obavezu da se sjednica direktno prenosi.

Predsjedavajući Živković odgovorio je da je, prilikom sazivanja ove sjednice, obavijestio i RTV servis o održavanju sjednice s pozivom da se angažiraju na osiguravanju direktnog TV prijenosa, ali da to nije učinjeno. Podsjetio je da na dnevnom redu imamo zaključak Komisije za saobraćaj i komunikacije vezano za raspravu o RTV servisu, te da će se ta rasprava organizirati u oba doma i da će se vjerovatno naći mogućnost i za osiguravanje prijenosa sjednica.

U raspravi o dnevnom redu učestvovali su:

- **Ekrem Ajanović** – govorio je u vezi s amandmanima Radne grupe koja je, u skladu sa zaduženjem koje je dobila od Doma, usaglasila amandmane na Zakon o sportu i podnijela Domu 19 usaglašenih amandmana. Rekao je da amandman 7. Radne grupe na član 20. Prijedloga zakona (koji je ranije bio drugačije formuliran) krši Ustav BiH.

- **Jozo Križanović** također je govorio u vezi s amandmanima Radne grupe. Rekao je da su oni kasno dostavljeni poslanicima pa je zbog toga predložio da se odgodi izjašnjavanje o amandmanima i o Zakonu o sportu.

- **Beriz Belkić** izrazio je razumijevanje za prijedloge Ajanovića i Križanovića, ali se nije složio da se odgodi izjašnjavanje o Zakonu o sportu. Dodao je da se već nekoliko godina pokušava donijeti Zakon o sportu i da postoji puni konsenzus da je on neophodan. Dom je osnovao radnu grupu zato što se došlo u situaciju da smo imali veliki broj amandmana o kojima se nije mogao postići konsenzus, zbog čega je osnovana radna grupa i dato joj povjerenje da ona pokuša pripremiti amandmane s kojima bi se mogao usvojiti Zakon, rekao je Beriz Belkić.

- **Šefik Džaferović** rekao je da je važno što su se sva tri člana Radne grupe usaglasila o amandmanima sadržanim u Izvještaju Radne grupe. Dodao je da poslanici imaju vremena da sve to pročitaju i sravne sa svojim amandmanima, a da će se na kraju svakako o svemu glasati, kako bi ipak dobili Zakon o sportu.

- **Momčilo Novaković** rekao je da on podržava sva nastojanja da se dođe do usaglašenog teksta Zakona, ali da insistira da se do toga dođe u skladu s Poslovnikom. Dodao je da misli da Radnoj grupi nije dat mandat da ovako izađe na Dom sa usaglašenim amandmanima, već da s podnosiocima amandmana i predstavnikom resornog ministarstva usaglasi amandmane i da u daljnjoj poslovničkoj proceduri ti amandmani na Dom dođu preko Ustavnopravne komisije, jer je Dom jedino Ustavnopravnoj komisiji mogao vratiti Izvještaj. Naglasio je da je uvijek bio i da će uvijek biti protiv kršenja Poslovnika i predložio da se skine Prijedlog zakona o sportu s dnevnog reda i da se uvrsti na sljedeću sjednicu Doma.

- **Azra Hadžiahmetović** usprotivila se prijedlogu da se Prijedlog zakona o sportu skine s dnevnog reda i predložila da se okonča procedura jer se već dugo radilo na ovom zakonu.

- **Martin Raguž** je, kao član Radne grupe, rekao da je Radna grupa radila u konsultacijama s resornim ministrom i da smatra da su napravili kvalitetan izvještaj i značajan pomak u odnosu na ono što smo imali u prvoj fazi rasprave o predmetnom zakonu. Naglasio je da misli da nema nijednog opravdanog razloga da se skida tačka s dnevnog reda, već da treba konačno donijeti Zakon o sportu.

- **Denis Bećirović** naglasio je da je on za to da se što prije donesu svi potrebni zakoni i da je on i ranije na tome insistirao, posebno na Zakonu o sportu, ali da je on u plenarnoj fazi podnio deset amandmana i da nije u mogućnosti na brzinu uporediti da li je njegove amandmane Radna grupa prihvatila ili nije, jer je Izvještaj dobio 15 minuta prije početka sjednice. Zato je predložio da se poslanicima da dovoljno vremena kako bi mogli kvalitetno diskutirati i odlučivati.

- **Halid Genjac** je, kao predsjedavajući Radne grupe, rekao da je Grupa naporno radila i uložila dosta truda da se postigne kompromis kako bi se usvojio Zakon. Predložio je da Kolegij, u skladu s članom 118. tačke 3. pod a) Poslovnika, omogući podnošenje amandmana kako bi se zadovoljili opravdani zahtjevi poslanika.

Poslije rasprave, predsjedavajući Živković konstatirao je da je iznesen samo jedan prijedlog za izmjenu dnevnog reda, a to je da se skine Prijedlog zakona o sportu. Ovaj prijedlog dao je na glasanje.

Prijedlog nije usvojen. "Za" je glasalo osam, "protiv" 25, "suzdržala" su se četiri poslanika.

Predsjedavajući Živković zatim je konstatirao da 20. sjednica Doma ima sljedeći

DNEVNI RED

1. Usvajanje Zapisnika 19. sjednice Predstavničkog doma;
2. Poslanička pitanja i odgovori;
3. Prijedlog zakona o sportu u Bosni i Hercegovini (drugo čitanje);
4. Prijedlog zakona o vinu, rakiji i drugim proizvodima od grožđa i vina (drugo čitanje);
5. Prijedlogu zakona o osnivanju Zavoda za izvršenje krivičnih sankcija, pritvora i drugih mjera (drugo čitanje);
6. Prijedlog zakona o izmjenama i dopunama Zakona o putnim ispravama BiH (drugo čitanje);
7. Prijedlog zakona o izmjenama i dopunama Izbornog zakona BiH – prvo čitanje (predlagači: poslanici Šefik Džaferović, Niko Lozančić i Milorad Živković);
8. Prijedlog zakona o izmjenama i dopunama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu (prvo čitanje);
9. Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine (prvo čitanje);
10. Prijedlog zakona o izmjeni Zakona o odlikovanjima Bosne i Hercegovine (prvo čitanje);
11. Prijedlog zakona o denacionalizaciji (prvo čitanje);

12. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH (prvo čitanje) – predlagatelj: Komisija za saobraćaj i komunikacije;
13. Prijedlog zakona o izmjenama i dopunama Zakona o PDV-u, s mišljenjem Komisije za finansije i budžet (predlagatelj Zakona: poslanik Branko Dokić);
14. Prijedlog zakona o izmjenama i dopunama Zakona o izmirenju obaveza po osnovu računa stare devizne štednje, s Mišljenjem Komisije za finansije i budžet (predlagatelj Zakona: poslanik Jerko Ivanković Lijanović);
15. Prijedlog zaključaka Komisije za saobraćaj i komunikacije povodom razmatranja Izvještaja o radu i poslovanju Javnog RTV servisa BiH, sa Izvještajem o radu Upravnog odbora Javnog RTV servisa;
16. Rasprava o temi: Vijeće Evrope i njegove aktivnosti (osnova za raspravu je Izvještaj o radu Delegacije Parlamentarne skupštine BiH u Parlamentarnoj skupštini Vijeća Evrope u 2007. godini);
17. Informacija o izdatim dozvolama za promet oružja, vojne opreme i proizvoda dvojne namjene u 2006. godini;
18. Prijedlog za imenovanje članova međuparlamentarnih grupa prijateljstva (predlagatelj: Komisija za vanjske poslove Predstavničkog doma);
19. Davanje saglasnosti za ratifikaciju Sporazuma između Vijeća ministara BiH i Vlade Islamske Republike Pakistan o osnivanju Bosanskohercegovačko-pakistanske ekonomske komisije.

Predsjedavajući Doma podsjetio je poslanike da će se, u skladu sa Zaključkom Doma, o tačkama dnevnog reda prvo raspravljati, a na kraju glasati. Tako je u Domu i urađeno. Međutim, radi preglednosti, u Zapisniku će se odmah navoditi i rezultati glasanja o materijalima iz tačaka dnevnog reda.

Ad. 1. Usvajanje Zapisnika 19. sjednice Predstavničkog doma

Mirko Okolić prigovorio je zašto se zapisnik prethodne sjednice ne dostavlja uz poziv za sjednicu, već svaki put u pozivu piše da će biti dostavljen naknadno. Naglasio je da bi, u principu, zapisnik trebalo dostavljati uz poziv za sjednicu kako bi poslanici imali vremena pročitati i eventualno dati primjedbe.

Uz ovu primjedbu, Zapisnik 19. sjednice usvojen je jednoglasno – sa 32 glasa (Federacija BiH 20, RS 12).

Ad. 2. Poslanička pitanja i odgovori

Predsjedavajući Živković je u uvodnim napomena rekao da su odgovore za ovu sjednicu dobili:

- Rifat Dolić - na pitanje postavljeno na 10. sjednici;
- Milorad Živković, Slavko Jovičić i Rifat Dolić (dva odgovora) - na pitanja postavljena na 14. sjednici;
- Salko Sokolović, Mehmed Suljkanović, Snježana Rajilić, Branko Dokić, Jozo Križanović i Denis Bećirović (dva odgovora) - na pitanja postavljena na 15. sjednici;
- Drago Kalabić i Slavko Jovičić - na pitanja postavljena na 16. sjednici;
- Niko Lozančić, Husein Nanić i Sefer Halilović (dva odgovora) - na pitanja postavljena na 18. sjednici; i
- Salko Sokolović, Bakir Izetbegović, Halid Genjac, Šefik Džaferović, Husein Nanić, Sadik Ahmetović, Adem Huskić, Azra Alajbegović, Selim Bešlić i Jerko Ivanković Lijanović – na pitanja postavljena na Prvoj posebnoj sjednici oba doma.

Odgovore na pitanja komentirali su: Sefer Halilović, Adem Huskić i Slavko Jovičić.

Postavljena su nova pitanja kako slijedi:

Lazar Prodanović:

“Kada će Ministarstvo vanjskih poslova BiH uputiti Predstavničkom domu Parlamentarne skupštine BiH na razmatranje radi davanja saglasnosti o ratifikaciji Sporazum o kulturnoj i naučnoj saradnji između BiH i Republike Bugarske? Naime, smatram da kašnjenje ratifikacije ovog sporazuma umanjuje obim kulturne i naučne saradnje između naše države i nama prijateljske države Bugarske.”

Sadik Bahtić:

“Moje poslaničko pitanje Ministarstvu civilnih poslova BiH, Direkciji CIPS-a. Tražim od Direkcije za implementaciju Projekta CIPS precizan rok početka izdavanja novih saobraćajnih dozvola.”

Mirko Okolić:

“Moje poslaničko pitanje upućeno je Direkciji za ceste Federacije BiH i gradu Sarajevu. Za sada je izgledno da se u dogledno vrijeme neće dugotrajnije riješiti pitanje zaobilaznog saobraćaja – tranzita oko Sarajeva, na magistralnom putu Doboj – Zenica – Sarajevo – Mostar, kroz projekat međunarodnog autoputa (Koridor Vc). Iz tog razloga pitam da li ćete preduzeti nešto na privremenom rješavanju zagušenosti saobraćaja magistralnog puta na relaciji Vogošćanska petlja - Mostarska petlja, a naročito na relaciji od Rajlovca do Mostarske petlje? Da li će se početi šta raditi na privremenom rješenju ove saobraćajne gužve na Magistralnom putu Doboj-Zenica, Sarajevo-Mostar kroz Sarajevo, odnosno preciznije rečeno od dionice Vogošćanska petlja i još preciznije rečeno od dionice Rajlovac do Mostarske petlje?”

Remzija Kadrić:

“Moje pitanje upućujem Ministarstvu pravde BiH koje glasi: Da li ima slučajeva da se novčane kazne po osnovu kršenja državnih zakona ne usmjeravaju u budžet BiH nego u budžete entiteta? Kao npr. novčane kazne po osnovu kršenja Zakona o osnovama sigurnosti saobraćaja na putevima u BiH. Tražim pismeni odgovor.”

Šemsudin Mehmedović:

“Ja imam dva kratka pitanja.

“Prvo je Vijeću ministara BiH. Naime, Vijeće ministara BiH je svojom odlukom osnovalo Državnu komisiju za granice. Pitam – Koliko je BiH koštao rad ove komisije i kakvi su efekti njenog rada od osnivanja do danas?

I drugo pitanje Vijeću ministara BiH i Ministarstvu vanjske trgovine i ekonomskih odnosa BiH – Da li je zvanično upozorena Republika Hrvatska o kršenju Ugovora o slobodnoj trgovini CEFTA zbog njenog diskriminirajućeg i neusklađenog Zakona o trošarinama ili akcizama, o čemu je dala mišljenje i Evropska komisija u svom izvještaju, te da li Vijeće ministara BiH namjerava uvesti kontramjere u skladu s pomenutim ugovorom? »

Slavko Matić:

«Postavljam pitanje Vijeću ministara BiH, odnosno Ministarstvu prometa i komunikacija BiH: Kada se planira i u kojoj fazi će početi izgradnja autoputa tzv. Koridora Vc u sjevernom dijelu BiH, spoju s Republikom Hrvatskom, odnosno dionice od rijeke Save do Doboja?”

Sefer Halilović:

“Moje pitanje upućeno je predsjedavajućem Vijeća ministara BiH gospodinu doktoru Nikoli Špiriću. Pitanje glasi:

U kojoj je fazi stanje po pitanju jugoslovenskog naftovoda JANOF, koji se proteže od Krka do Bosanskog Broda, a koji bi trebalo da bude u nadležnosti Državne komisije za sukcesiju?”

Rifat Dolić:

“Imam tri pitanja.

Prvo pitanje ministru odbrane BiH: Šta možete učiniti kao resorni ministar da prestane obespravljanje i diskriminacija ljudi u Velikoj Kladuši prilikom pokušaja da u Odjeljenju odbrane u Velikoj Kladuši dobiju potvrde o vremenu provedenom u Armiji BiH i formacijama čiji je ona sljednik, a u svrhu korištenja stečenih prava po osnovu Zakona o pravima branitelja i njihovih porodica u Federaciji BiH i Zakona o pravima demobiliziranih boraca u Federaciji BiH?

Drugo pitanje je predsjedavajućem Vijeća ministara BiH, ministru vanjske trgovine BiH i ministru vanjskih poslova BiH: Šta ste preduzeli na moju inicijativu iz jula mjeseca ove godine za slanje note vlastima Republike Srbije i preduzimanje koraka na zaštiti imovine firme „Agrokomerc“ D.D. Velika Kladuša u Beogradu, koja je i danas izložena nasrtajima za njenu navodnu privatizaciju, a u biti se radi o uobičajenoj formuli organizirane pljačke imovine BiH u drugim zemljama?

Treće pitanje je pitanje ministru pravde BiH u Vijeću ministara BiH: U kojoj fazi sudskog procesa je postupak po predmetu četverostrukog ubistva koji se više od 14 godina protiv Emina Pivića, Safeta Vardića, Muharema Tutića, Mehmeda Čehića i Fikreta Seferagića vodi u Bihaću pod sumnjom ili optužbom da su, 20.7.1993., u centru Bihaća bez ikakvog povoda na monstrozno način iz vatrenog oružja ubili Arifa Begića, Rasima Alagića, Adema Tutića i Nisretu Abdagić?

Azra Alajbegović:

“Imam dva vrlo kratka pitanja.

Prvo pitanje je: Da li je ratificirana Bolonjska deklaracija i ako nije, šta su razlozi neratifikacije?

Drugo pitanje je: Šta misli raditi Vijeće ministara BiH i Ministarstvo civilnih poslova BiH po pitanju standardizacije uslova za otvaranje novih fakulteta u BiH, kako bi se uredila oblast visokog obrazovanja?”

Denis Bećirović:

“Imam tri pitanja.

Prvo pitanje: Šta je konkretno učinilo Vijeće ministara BiH u aktuelnom sazivu s ciljem rješavanja pitanja starih deviznih štediša?

Drugo pitanje: Šta ste konkretno učinili u vezi s pitanjem donošenja Zakona o restituciji, odnosno povratu imovine i obeštećenju fizičkih, pravnih lica čija je imovina podržavljena primjenom propisa o agrarnoj reformi, konfiskaciji, sekvestraciji, nacionalizaciji i eksproprijaciji i drugih propisa koji su doneseni i primjenjivani nakon 1945.godine? Pitanje upućujem predsjedavajućem Vijeća ministara BiH.”

I treće pitanje. Imajući u vidu preuzete obaveze prema Vijeću Evrope, postavljam pitanje: Šta ste do sada učinili s ciljem izrade i usvajanja Zakona o kulturnom naslijeđu u BiH, te usvajanja Strategije razvoja kulture u BiH? Ovo treće pitanje postavljam ministru civilnih poslova BiH.

Selim Bešlić:

« Imam dva vrlo kratka pitanja. Odlukom Predstavničkog doma, od 12.4.2007., ratificiran je Sporazum o socijalnom osiguranju s Republikom Slovenijom. Prema našim saznanjima, do danas ova odluka nije ratificirana u Parlamentu Republike Slovenije. Pitanje: Šta će preduzeti Vijeće ministara BiH da se ubrza proces ratifikacije u Parlamentu Republike Slovenije, kako bi građani BiH koji godinama čekaju mogli koristiti svoja prava po ovom osnovu?

Drugo pitanje: Ovih dana je nevladina organizacija „Spona“ iz Republike Srpske podnijela krivičnu prijavu protiv 52 Bošnjaka iz Srebrenice Tužilaštvu za ratne zločine Republike Srbije u Beogradu. Postavljam pitanje: Šta će preduzeti Vijeće ministara BiH, Ministarstvo vanjskih poslova BiH, Ministarstvo pravde BiH posebno, Tužilaštvo BiH, Ministarstvo za ljudska prava i izbjeglice BiH za zaštitu građana BiH kao i cjelokupni integritet pravnog sistema BiH?”

Savo Erić:

“Pošto nisam dobio odgovor na moje poslaničko pitanje koje sam postavio u dva navrata, ponavljam ga. Šta je s Ugovorom između Srpske pravoslavne crkve i BiH?”

Sead Jamakosmanović:

Moje pitanje upućeno je Ministarstvu vanjskih poslova BiH. Prema mojim saznanjima, već duže vrijeme prisutna je praksa u Ministarstvu vanjskih poslova BiH degradiranja radnika Ministarstva po povratku iz DKP-a - ambasadora i višerangiranih diplomata. Mnogima se nakon povratka nude izjave da dobrovoljno potpišu svoje degradiranje, uprkos Zakonu o državnoj službi, koji ovu materiju sasvim drugačije definira. U uređenim državama normalno je da državni službenici napreduju nakon povratka s rada iz DKP-a ili bar zadrže status koji su imali prilikom odlaska u destinaciju DKP-a.

Pitam: Da li ministar vanjskih poslova BiH postavlja po sistemu ad hoc kadrovsku strukturu u DKP-ima i tražim pismeni odgovor o radnom statusu ljudi koji su se vratili s rada iz DKP-a, gdje su, šta rade i šta će raditi, njihovu nacionalnu strukturu i precizan izvještaj o svim internim postavljenjima u MVP-u za posljednju godinu dana?

Velimir Jukić:

“Upućujem pitanje Vijeću ministara BiH: Zašto BiH nije članica Svjetske carinske organizacije, šta preduzima i šta će preduzeti Vijeće ministara BiH na pristupanju BiH u ovu organizaciju?”

Adem Huskić:

“U pripremi Prve posebne zajedničke sjednice postavio sam pitanje za Vijeće ministara BiH: “Koje mjere iz svoje nadležnosti ste do sada preduzeli i šta namjeravate preduzeti da bi naša država postala privlačna stranim ulagačima i šta je prepreka da do sada nisu preduzete odgovarajuće mjere?”

Odgovor koji mi je dostavljen ne odgovara na postavljeno pitanje. FIPA je zadužena za promociju stranih investicija a ne za stvaranje povoljnije poslovne klime, a to je bio smisao pitanja.

Molim da još jednom razmotrite pitanje i poboljšate poslovnu klimu u našoj zemlji”.

U okviru ove tačke, na prijedlog Denisa Bećirovića, Dom je usvojio zaključak da se do naredne sjednice Doma poslanicima dostavi pregled svih poslaničkih pitanja na koja nije odgovoreno do 20. sjednice Doma.

Zaključak je usvojen jednoglasno – sa 35 glasova.

Ad .3. Prijedlog zakona o sportu u Bosni i Hercegovini (drugo čitanje)

Poslije kraćih uvodnih napomena predsjedavajućeg, Halid Genjac obrazložio je Izvještaj Radne grupe koja je usaglašavala amandmane podnesene u plenarnoj fazi na Prijedlog zakona o sportu.

U raspravi su učestvovali: Ekrem Ajanović, Drago Kalabić, Momčilo Novaković, Martin Raguž, Halid Genjac, Denis Bećirović, Šefik Džaferović, Adem Huskić, Bajazit Jašarević, Azra Alajbegović i Vinko Zorić.

Poslije rasprave, predsjedavajući Živković rekao je da se Kolegij dogovarao o načinu kako da se okonča ova tačka dnevnog reda, da se danas Dom izjasni o Prijedlogu zakona, a da se nijednom poslaniku ne uskrati pravo da podnese amandmane na Prijedlog zakona. Rekao je da se Kolegij dogovorio. Naglasio je da je odlučeno da se u pauzi Radna grupa i Ustavnopravna komisija usaglase o tome kakav je status amandmana Ustavnopravne komisije od 8. oktobra 2007., da se eventualno podnese amandman kojim se pobijaju ostali amandmani, a nakon toga bi se glasalo o amandmanima Radne grupe i o svim onim amandmanima koje poslanici ponovo žele braniti, uključujući i amandmane na amandmane Radne grupe – da te amandmane do momenta glasanja podnesu. Pozvao je poslanike koji su ranije podnijeli amandmane u plenarnoj fazi da obavijeste da li ih i dalje brane, kako bi ih Kolegij stavio na glasanje.

Prilikom glasanja, predsjedavajući Živković konstatirao je da je u Kolegiju dogovoreno da Izvještaj Ustavnopravna komisije, nakon usaglašavanja amandmana u Radnoj grupi, nije na snazi. Zatim je rekao da će se Dom prvo izjasniti o amandmanima Radne grupe u paketu, a nakon toga će se glasati o amandmanima koji se brane u plenarnoj fazi. Zatim je na glasanje dao amandmane Radne grupe u paketu.

Sa 26 glasova "za" (Federacija BiH 19, RS devet), pet "protiv" i četiri "suzdržana", usvojeni su amandmani sadržani u Izvještaju Radne grupe.

Dalje je predsjedavajući na glasanje dao amandman Ekrema Ajanovića koji je podnio na amandman broj 7. Radne grupe.

Amandman nije usvojen. "Za" je glasalo sedam, "protiv" 22, "suzdržalo" se pet poslanika.

Predsjedavajući je obavijestio Dom da je Denis Bećirović ostao kod svojih devet amandmana, a da je njegov deseti amandman usvojila Radna grupa. Zatim je amandmane Denisa Bećirovića dao na glasanje. Nije usvojen nijedan amandman. Rezultati glasanja su sljedeći:

- Amandman 1. "za" glasalo pet, "protiv" 27, "suzdržalo" se tri poslanika
- Amandman 2. "za" glasalo pet, "protiv" 26, "suzdržalo" se četiri poslanika
- Amandman 3. "za" glasalo pet, protiv 26, "suzdržalo" se tri poslanika
- Amandman 4. "za" glasalo pet, protiv 26, "suzdržalo" se tri poslanika
- Amandman 5. "za" glasalo pet, "protiv" 23, "suzdržalo" se sedam poslanika
- Amandman 6. "za" glasalo pet, "protiv" 23, "suzdržalo" se sedam poslanika
- Amandman 7. "za" glasalo pet, "protiv" 25, "suzdržalo" se četiri poslanika
- Amandman 8. "za" glasalo šest, "protiv" 27, "suzdržalo" se dva poslanika
- Amandman 9. "za" glasalo osam, "protiv" 26, "suzdržao" se jedan poslanik.

Dom se dalje izjasnio o četiri amandmana Momčila Novakovića. Također nije usvojen nijedan amandman. Rezultati su sljedeći:

- Amandman 1. "za" glasalo pet, "protiv" 26, "suzdržalo" se šest poslanika
- Amandman 2. "za" glasalo četiri, "protiv" 21, "suzdržalo" se osam poslanika
- Amandman 3. "za" glasalo pet, "protiv" 22, "suzdržalo" se osam poslanika
- Amandman 4. "za" glasalo pet, "protiv" 24, "suzdržalo" se šest poslanika

Nakon glasanja o amandmanima, predsjedavajući je dao na glasanje Prijedlog zakona o sportu.

Sa 26 glasova "za" (Federacija BiH 19, RS sedam), četiri "protiv" i četiri "suzdržana", usvojen je Zakon o sportu u Bosni i Hercegovini.

Ad. 4. Prijedlog zakona o vinu, rakiji i drugim proizvodima od grožđa i vina (drugo čitanje)

U uvodnim napomenama predsjedavajući je podsjetio da je na 18. sjednici odgođeno izjašnjavanje o Prijedlogu zakona u drugom čitanju i da je nadležna komisija zadužena da, zajedno s predstavnikom resornog ministarstva, ponovo razmotri Prijedlog zakona i, eventualno, pozivom na član 118. stav (3) Poslovnika predloži amandmane. Novi izvještaj Komisije za vanjsku trgovinu i carine dostavljen je i u njemu je sadržano 13 amandmana koje je usvojila Komisija, rekao je predsjedavajući u uvodnim napomenama. Podsjetio je da je, nakon prvog izvještaja Komisije, Slavko Jovičić podnio 19 amandmana koje je želio braniti u plenarnoj fazi.

U raspravi je Momčilo Novaković rekao da će Klub SDS-a podržati amandmane Jovičića i zavisno od toga će se opredijeliti o Prijedlogu zakona.

Prilikom glasanja, predsjedavajući je rekao da je obaviješten da su povučeni amandmani koji su podneseni u plenarnoj fazi, pa je na glasanje dao Prijedlog zakona u drugom čitanju, sa Izvještajem Komisije i amandmanima sadržanim u Izvještaju.

Sa 26 glasova "za" (Federacija BiH 19, RS sedam), četiri "protiv" i četiri "suzdržana", usvojen je Zakon o vinu, rakiji i drugim proizvodima od grožđa i vina.

Ad. 5. Prijedlog zakona o osnivanju Zavoda za izvršenje krivičnih sankcija, pritvora i drugih mjera (drugo čitanje)

U uvodnim napomenama predsjedavajući je podsjetio na dosadašnju proceduru o ovom zakonskom prijedlogu, te na Izvještaj nadležne komisije koja je usvojila tri amandmana koji su postali sastavni dio Prijedloga zakona.

U ime Ustavno-pravne komisije kratko je govorio Šefik Džaferović.

Sa 26 glasova "za" (Federacija BiH 17, RS devet) i osam "suzdržanih", usvojen je Zakon o osnivanju Zavoda za izvršenje krivičnih sankcija, pritvora i drugih mjera.

Ad. 6. Prijedlog zakona o izmjenama i dopunama Zakona o putnim ispravama BiH **(drugo čitanje)**

Predsjedavajući je podnio kratke uvodne napomene, rekavši da je nadležna komisija podnijela Izvještaj s dva amandmana usvojena na Komisiji.

Nije bilo rasprave.

Sa 29 glasova "za" (Federacija BiH 17, RS 12) i pet "suzdržanih", usvojen je Zakon o izmjenama i dopunama Zakona o putnim ispravama BiH.

Ad. 7. Prijedlog zakona o izmjenama i dopunama Izbornog zakona BiH – prvo čitanje **(predlagači: poslanici Šefik Džaferović, Niko Lozančić i Milorad Živković)**

Predsjedavajući Živković podnio je uvodne napomene. Rekao je da su njegovi zamjenici i on preuzeli ulogu predlagača Zakona čiji je tekst pripremila Interresorna radna grupa. Podsjetio je da Interresorna radna grupa istovremeno radi i na pripremi izmjena i dopuna Zakona o sukobu interesa i pozvao poslanike da svoje prijedloge, sugestije i amandmane dostave do 29.1. 2008.

Halid Genac govorio je u ime Interresorne radne grupe i obrazložio Prijedlog zakona iz ove tačke.

U raspravi su učestvovali: Šefik Džaferović, Jerko Ivanković Lijanović, Rifat Dolić, Remzija Kadrić, Beriz Belkić i Milorad Živković.

Poslije rasprave, Dom je, sa 30 glasova "za" (Federacija BiH 18, RS 12) i pet "suzdržanih", usvojio Prijedlog zakona o izmjenama i dopunama Izbornog zakona BiH u prvom čitanju.

U raspravi je Šefik Džaferović podsjetio Dom da je Interresorna radna grupa domovima Parlamentarne skupštine BiH na usvajanje dostavila četiri inicijative vezane za: preciziranje rokova za konstitiranje vlasti u Ustavu BiH; promjenu odredbi u Ustavu Federacije BiH koje reguliraju način izbora delegata u Dom naroda Parlamenta Federacije BiH; preispitavanje odredbi Zakona o popunjavanju upražnjenog mjesta člana Predsjedništva BiH i harmoniziranje propisa koji reguliraju način izbora općinskih načelnika i gradonačelnika u oba entiteta i s tim u vezi iniciranja izmjena i dopuna Zakona o direktnom izboru općinskih načelnika u Federaciji BiH.

Sa 31 glasom "za" (Federacija BiH 19, RS 12) i četiri "suzdržana", Dom je usvojio ove inicijative Interresorne radne grupe.

Ad. 8. Prijedlog zakona o izmjenama i dopunama Zakona o učešću pripadnika **Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu (prvo čitanje)**

Poslije kraćih uvodnih napomena predsjedavajućeg, Momčilo Novaković postavio je određena pitanja na koja je odgovorila zamjenica ministra odbrane Marina Pendeš.

Sa 29 glasova "za" (Federacija BiH 20, RS devet) i šest "suzdržanih", usvojen je Prijedlog zakona iz ove tačke u prvom čitanju.

Ad. 9. Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine (prvo čitanje)

Poslije uvodnih napomena, u raspravi su učestvovali Beriz Belkić i Sadik Ahmetović. Oni su ukazali da su od određenih asocijacija stigla upozorenja da su rješenja ponuđena u ovom zakonu u suprotnosti s članom 11. Evropske povelje o ljudskim pravima i slobodama. Sugerirali su da se to otkloni u amandmanskoj fazi.

U vezi s ovim diskusijama govorio je zamjenik ministra pravde BiH Srđan Arnaut i podržao prijedloge da se u amandmanskoj fazi kritički razmotre odredbe Prijedloga zakona.

Sa 30 glasova "za" (Federacija BiH 18, RS 12) i pet "suzdržanih", usvojen je Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine u prvom čitanju.

Ad. 10. Prijedlog zakona o izmjeni Zakona o odlikovanjima Bosne i Hercegovine (prvo čitanje)

Nije bilo rasprave poslije uvodnih napomena predsjedavajućeg.

Prijedlog zakona o izmjeni Zakona o odlikovanjima usvojen je sa 31 glasom "za" (Federacija BiH 20, RS 11) i četiri "suzdržana".

Ad .11. Prijedlog zakona o denacionalizaciji (prvo čitanje)

Poslije osnovnih uvodnih napomena predsjedavajućeg, Šefik Džaferović kratko je govorio u ime Ustavnopravne komisije.

U raspravi su učestvovali: Drago Kalabić, Momčilo Novaković, Martin Raguž, Velimir Jukić, Adem Huskić, Šefik Džaferović, Selim Bešlić, Niko Lozančić, Ekrem Ajanović, Jozo Križanović i Husein Nanić.

Poslije rasprave, sa 25 glasova "za" (Federacija BiH 16, RS devet) i devet "suzdržanih", usvojen je Prijedlog zakona o denacionalizaciji u prvom čitanju.

Sa 33 glasa "za" (Federacija BiH 21, RS 12) i dva "suzdržana", data je podrška Ustavnoj komisiji da organizira javnu raspravu o Prijedlogu ovog zakona.

Ad. 12. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH (prvo čitanje) – predlažak: Komisija za saobraćaj i komunikacije

Predsjedavajući je dao osnovne uvodne napomene.

Nije bilo rasprave.

Prijedlog zakona usvojen je u prvom čitanju sa 29 glasova "za" (Federacija BiH 17, RS 12) i pet "suzdržanih".

Ad.13. Prijedlog zakona o izmjenama i dopunama Zakona o PDV-u, s Mišljenjem Komisije za finansije i budžet (predlažak Zakona: poslanik Branko Dokić)

Predsjedavajući je u uvodnim napomenama podsjetio na proceduru u slučaju kada je mišljenje nadležne komisije o prijedlogu zakona negativno.

U svojstvu predlažaka govorio je Branko Dokić.

Stav Vijeća ministara BiH u vezi s ovim zakonskim prijedlogom iznio je Fuad Kasumović, zamjenik ministra finansija i trezora BiH.

U raspravi su učestvovali: Branko Dokić, Sadik Bahtić, Selim Bešlić, Momčilo Novaković, Slavko Jovičić, Šemsudin Mehmedović, Husein Nanić, Jozo Križanović, Adem Huskić, Savo Erić i Bajazit Jašarević.

Prilikom glasanja, Mišljenje Komisije za finansije i budžet usvojeno je – "za" glasala 23 poslanika (Federacija BiH 15, RS osam), "protiv" je glasalo 10, "suzdržao" se jedan poslanik.

Predsjedavajući je konstatirao da je odbijen Prijedlog zakona o izmjenama i dopunama Zakona o PDV-u.

Ad .14. Prijedlog zakona o izmjenama i dopunama Zakona o izmirenju obaveza po osnovu računa stare devizne štednje, s Mišljenjem Komisije za finansije i budžet (predlažak Zakona: poslanik Jerko Ivanković Lijanović)

Uvodne napomene dao je predsjedavajući Živković, podsjetivši da se i u ovoj tački odlučuje o negativnom mišljenju Komisije za finansije i budžet.

Jerko Ivanković Lijanović obrazložio je Prijedlog zakona.

Zamjenik resornog ministra Fuad Kasumović je i o ovom prijedlogu zakona iznio stav Vijeća ministara BiH.

U ime Udruženja deviznih štediša govorili su Svetozar Nišić i Muris Srkalović.

U raspravi su učestvovali: Slavko Jovičić, Rifat Dolić, Momčilo Novaković, Milorad Živković, Mirko Okolić, Milica Marković, Lazar Prodanović, Jerko Ivanković Lijanović, Savo Erić, Drago Kalabić, Vinko Zorić, Branko Dokić, Hadži Jovan Mitrović i Jozo Križanović.

Sa 24 glasa "za" (Federacija BiH 16, RS osam), devet "protiv" i dva "suzdržana", usvojeno je Mišljenje Komisije za finansije i budžet, pa je, prema tome, odbijen i ovaj prijedlog zakona.

Jerko Ivanković Lijanović je u raspravi predložio zaključak koji glasi:

„Imenuje se Ad hoc komisija za razgovore s Udruženjem starih deviznih štediša BiH u kojoj će biti predstavnik predlagача Prijedloga zakona o izmjenama i dopunama Zakona o izmirenju obaveza po osnovu računa stare devizne štednje, koji je razmatran na ovoj sjednici, i po jedan član iz najvećeg kluba iz svakog entiteta.“

Zaključak nije usvojen. " Za" je glasalo 14, "protiv" 15, "suzdržala" su se četiri poslanika.

Ad.15. Prijedlog zaključaka Komisije za saobraćaj i komunikacije povodom razmatranja Izvještaja o radu i poslovanju Javnog RTV servisa BiH, sa Izvještajem o radu Upravnog odbora Javnog RTV servisa

Nije bilo rasprave poslije uvodnih napomena predsjedavajućeg.

Na prijedlog Komisije za saobraćaj i komunikacije, Dom je, sa 31 glasom „za“, jednim „protiv“ i tri „suzdržana“, usvojio sljedeće zaključke:

1. Predstavnički dom Parlamentarne skupštine BiH traži od Upravnog odbora Javnog RTV servisa BiH da što prije sačini i dostavi Parlamentarnoj skupštini BiH:

- a) sveobuhvatan plan mjera za prevazilaženje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu,
- b) plan programa i finansijski plan za 2008. godinu (u skladu s članom 29. stav (1) tačka k) Zakona o Javnom RTV servisu BiH).

2. Uzimajući u obzir stanje u kojem se nalazi Javni RTV servis BiH, Predstavnički dom Parlamentarne skupštine BiH smatra da je neophodno održati zajedničku sjednicu oba doma Parlamentarne skupštine BiH s jedinom tačkom dnevnog reda: Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu.

Ad.16. Rasprava o temi: Vijeće Evrope i njegove aktivnosti (osnova za raspravu je Izvještaj o radu Delegacije Parlamentarne skupštine BiH u Parlamentarnoj skupštini Vijeća Evrope u 2007. godini)

Predsjedavajući Živković je u uvodnim napomenama podsjetio da je ova tačka stavljena u dnevni red u skladu s Rezolucijom br. 1557. Parlamentarne skupštine Vijeća Evrope. Osnova za raspravu je Izvještaj o radu Delegacije Parlamentarne skupštine BiH u Parlamentarnoj skupštini Vijeća Evrope u 2007. godini, koji je Komisija za vanjske poslove jednoglasno prihvatila, rekao je predsjedavajući Živković.

U raspravi o ovoj tački učestvovali su: Momčilo Novaković, Husein Nanić, Milica Marković i Branko Dokić.

Poslije rasprave, Dom je, sa 25 glasova "za" (Federacija BiH 17, RS osam), tri "protiv" i šest "suzdržanih", usvojio Izvještaj o radu Delegacije Parlamentarne skupštine BiH u Parlamentarnoj skupštini Vijeća Evrope u 2007. godini.

Na prijedlog Azre Hadžiahmetović, Dom je povodom ove tačke usvojio sljedeće zaključke:

- 1. Najmanje jednom godišnje, u Parlamentarnoj skupštini BiH bit će organizirana rasprava o radu Parlamentarne skupštine Vijeća Evrope, što je obaveza po Rezoluciji 1575. Parlamentarne skupštine Vijeća Evrope.**

2. Pred svako zasjedanje Parlamentarne skupštine Vijeća Evrope (četiri puta godišnje), kolegijima oba doma bit će dostavljen prijedlog dnevnog reda kako bi, u slučaju potrebe, inicirali aktivnosti (raspravu) u Parlamentarnoj skupštini BiH.
3. Nakon svakog zasjedanja Parlamentarne skupštine Vijeća Evrope, svim članovima Parlamentarne skupštine BiH bit će dostavljen Izvještaj o radu Delegacije.

Ad. 17. Informacija o izdatim dozvolama za promet oružja, vojne opreme i proizvoda dvojne namjene u 2006. godini

Osnovne uvodne napomene dao je predsjedavajući Živković.

Nije bilo rasprave.

Sa 33 glasa "za" i dva "suzdržana", Dom je primo k znanju Informaciju iz ove tačke.

Ad.18. Prijedlog za imenovanje članova međuparlamentarnih grupa prijateljstva (predlagač: Komisija za vanjske poslove Predstavničkog doma)

U uvodnim napomenama predsjedavajući je podsjetio na postupak izrade prijedloga, s naglaskom da su svi poslanici i delegati dobili upitnik na osnovu kojega je Komisija za vanjske poslove pripremila dostavljeni Prijedlog članova međuparlamentarnih grupa prijateljstva. Kazao je da je sa 19. sjednice skinuta ova tačka da bi se u konsultacijama sa Domom naroda izradio zajednički prijedlog, međutim, od Doma naroda nije bilo prijedloga. U Prijedlogu koji je na dnevnom redu zastupljeni su i poslanici i delegatai, rekao je predsjedavajući Živković.

U raspravi je Šefik Džaferović rekao da se iz materijala vidi da jedan poslanik nije dostavio anketu, ali da su četvorica dostavili, ali se njihovi odgovori ne nalaze u materijalu dostavljenom Komisiji, pa se stoga smatara da oni nisu bili zainteresirani za članstvo u grupama. Predložio je da se to razjasni.

Nije bilo daljnje rasprave.

Sa 32 glasa "za" (Federacija BiH 19, RS 13) i tri "suzdržana", usvojen je Prijedlog članstva u međuparlamentarnim grupama prijateljstva, prema prijedlogu Komisije za vanjske poslove.

Ad. 19. Davanje saglasnosti za ratifikaciju Sporazuma između Vijeća ministara BiH i Vlade Islamske Republike Pakistan o osnivanju Bosanskohercegovačko-pakistanske ekonomske komisije

Predsjedavajući je rekao da je nadležna komisija dala pozitivno mišljenje o ovom sporazumu.

Nije bilo rasprave.

Sa 33 glasa "za" i dva "suzdržana", Dom je dao saglasnost za ratifikaciju Sporazuma iz ove tačke.

Ovim je realiziran dnevni red 20. sjednice.

Sjednica Doma je završena u 19,20 sati.

Sastavni dio Zapisnika je transkript 20. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković